

les vns des autres, et prindrent congé, et se retira ledit *Agouhanna* à ses barques, pour soy retirer et aller en son lieu. Et pareillement ledit Capitaine fit apporter noz barques pour passer outre, et aller à-mont ledit fleuve avec le flot pour chercher hable et lieu de sauveté, pour mettre les navires, et fumes outre ledit fleuve environ dix lieuës côtoyans ladite ile, et au bout d'icelle trouvames vn affourc d'eau fort beau et plaisant, auquel lieu y a vne petite riviere, et hable de barre marinant de deux à trois brasses, que trouvames lieu à nous propice pour mettre nosdites navires à sauveté. Nous nommames ledit lieu *SAINTE-CROIX*, par ce que ledit jour y arrivames. Aupres d'icelui lieu y a vn peuple dont est Seigneur ledit *Donnacona* et y est sa demeure, laquelle se nomme *Stadaconé*, qui est aussi bonne terre qu'il soit possible de voir et bien fructiferante, pleine de moult beaux arbres de la nature et sorte de France, comme Chénes, Ormes, Fraines, Noyers, Pruniers, Ifs, Cedres, Vignes, Aubépines, qui portent fruit aussi gros que prunes de Damas, et autres ar- || bres, souz 314
lesquels croit aussi bon Chanvre que celui de France, lequel vient sans semence ni labeur. Apres avoir visité ledit lieu, et trouvé estre convenable, se retira ledit Capitaine et les autres dedans les barques pour retourner aux navires. Et ainsi que sortimes hors ladite riviere, trouvames au devant de nous l'un des seigneurs dudit peuple de *Stadaconé*, accompagné de plusieurs gens tant hommes que femmes, lequel Seigneur commença à faire vn prechement à la façon et mode du païs, qui est joye et assurance, et les femmes dansoient et chantoient sans cesse estans en